

禹

貢

集

釋

禹貢集釋自敘

釋禹貢者以孔安國爲最古顧安國傳爲贗作不足徵信胡東樵斥爲顛頽鶻突不甚分明蓋知言也東樵雖指畧例又稱司馬遷從安國問古文班氏崇古學漢志所稱古文卽安國壁中古文之說水經酈注爲禹貢之功臣誠哉其知言也余獨惜東樵能知古人而不能信好古學雖指一書踵謬沿譌悖古文而逞臆見後之學者將何所取正焉夫釋禹貢者莫善于司馬子長班孟堅桑君長三家酈注擇精語詳補水經所未及明此數家于禹貢思過半矣漢鄭君古注勵有存者許君說文亦有古文說皆卓然古

學此皆禹貢之津筏舍此而欲通禹貢譬猶杭絕流斷港而欲至于海也漢書儒林傳孔氏有古文尙書孔安國以今文字讀之司馬遷從安國問故遷書禹貢多古文說史記夏木紀敷作傅岷作汝斥作鴻糜作會豬作都球作璆岳作嶽溢作沃錫作賜導皆作道崑崙作昆倫皆古文也又澧作醴喫作沃暨作泉灘作雍沿作均皆與班志合潛作涔與韓詩合漾作瀼刊作栞充作沈並與說文合烏夷皮服榮播旣都作十有三年皆與馬鄭古文合說隨山刊木爲行山表木說奠高山爲定說降邱宅土爲下邱居士說篠簜爲竹箭說孔殷爲甚中說男邦爲任國說禹錫元

圭告厥成功爲帝乃錫禹元圭告成功于天下河渠書說
北載之高地過降水同爲逆河入于勃海此真古文書說
子長得之安國正義所謂身爲博士具見圖籍者非古文
僞傳比也今東樵于島夷仍依僞古文于元圭从蔡傳禹
以爲贊之說是不信子長真古文也班孟堅撰地理志自
謂采獲舊聞考迹詩書推表山川以綴禹貢漢志藝作蓀
攸作迺野作墾濱作灝草作少潛作瀘澧作鄆伊洛作雒
漾水作養漳水作章西傾作頃厥篚作棐是來作徯瀛澑
作苗夏翟作狄渠搜作叟陪尾作倍尾孟津作盟津雲土
夢作雲夢土皆古文也志稱禹貢山水三十五又稱古文

者十有一東樵于志言禹貢嶓冢漾水菏水浲水大別桓
水及古文終南流沙陪尾皆所不取是不信孟堅真古文
也新唐書志謂水經漢桑欽作東樵疑非欽作又據酈注
漂水引桑欽地理志謂欽所撰名地理志不名水經此則
大謬案漂水注引桑欽地理志曰漂水出高唐漢地理志
高唐下桑欽言漂水所出善長所引桑欽地理志連文卽
謂漢地理志桑欽說非欽別撰地理志也東樵誤會酈注
遂謂欽所作名地理志此郢書燕說也水經原出桑欽後
人譖加坿益故有東漢三國地名漢儒林傳稱塗惲授桑
欽古文尙書則桑欽所說亦依古文書也地理志引桑欽

者七絳水汶水溧水弱水淮水均有裨於禹貢說文引汶
水出琅琊朱虛東泰山入瀘桑欽說汶水出泰山萊蕪西
南入沛瀦水出東郡東武陽入海桑欽云出平原高唐溺
水自張掖刪丹西至酒泉合黎餘波入于流沙桑欽說水
經禹貢山水澤地所在凡六十多桑欽古文說東樵于嶧
冢積石流沙大別陪尾東陵大邳皆不依水經說獨取九
江在長沙下雋之說不知後人所竄入非桑欽之本文也
東樵既顯悖冰經而于酈注亦援引多誤是不信桑欽真
古文也鄭康成從張恭祖受古文尙書今書注已佚其見
于他所引者說禹貢山水大抵墨守班志引地理志凡三

十有九惟梁州江沱及導黑水降永大陸引地志而不从其說餘皆從班志淄水引地志出泰山萊蕪縣志又言入沛鄭不引者水經稱苗水入海是禹時故道不入沛鄭之學博而精矣今考鄭注赤埴作哉與徐邈合和夷爲桓與酈注如氏說合訓箇範云聆風卽馬融長笛賦所稱聆風也于九河云今河間弓高以東至平原鬲津往往有其遺處漢許商平當言成平鬲縣界有徒駭胡蘇鬲津等河鄭君之說核矣東樵于鄭注引用甚渺而獨取三江之說不知乃徐堅誤引非鄭君之注也于冀州不書其界不取鄭注帝都廣大之說而取孔傳以餘州所至境界則可知鄭

注謂大伾在成皋三澨在竟陵東樵皆所不取是不信鄭君真古文也許君說文敘其偁孔氏皆古文也又云古文孔子壁中書也今考說文引禹貢繇作蘇漸作薪篠蕩作筱與古文論語合又引書曰竹箭如稽卽古文書說篠蕩作之文周禮職方氏注故書箭爲晉晉稽聲相近皆古文也瑤琨作瓊與馬融書及班志合璫珠作玼與大戴禮保傅篇合浮于淮泗達于菏與水經泗水篇合沉卽充之正字充俗字也濕卽溧之正字溧借字也濟水字當作涉與出賈皇之濟別說砮丹石可以爲矢鑑說禹貢鑑刪鑑可以刻鑑說三澨澨埤增水邊人所止者說潯陽葛灘山在東

海下邳說陶邱再成邱也在濟陰陶邱有堯城堯嘗所居
故堯號陶唐氏說帆山弱水之所出卽張掖雞山也說鼈
山在蜀郡湔氐徼外卽羊勝岷山也灘水出邛玆箕屋山
東入海引夏書灘澦其道漳水朝宗于海从水朝省朝宗
卽潮之正字漳與朝同是海潮已見于禹貢矣渭水出隴
西首陽渭首亭南谷東入河杜林說夏書以爲出鳥鼠山
卽杜林漆書古文說也東樵于淮泗達蕡取說文而謂蕡
在山陽湖陸乃出自後人禹時未有漾水出隴西東至武
都爲漢亦所不取不知許君說蕡漾與班志同皆古文東
樵于九江孔殷引說文殷薦上帝訓殷爲衆達古文殷中

之義是不信許君眞古文也嗚呼博學如東樵猶不能信好古文證合經義其所著書多沿宋以後之俗說泝其流而不先溯其源猶導河不于積石導江不于岷山烏在其能行水也余旣爲之正誤以匡東樵之失復采獲古文甄錄舊說砭俗訂謬斷以己意自史漢水經注及許鄭古學取其說之確者著于篇傳以後儒之解證以地志期于發擗經文無取泥古其引用前人說各繫姓氏于下輯禹貢集釋三卷庶以備遺忘便尋省其有不符應時輒改先儒有言前人之失吾知之吾之失吾不能自知也安得信好古學者而就正之哉戊子三月山陽丁晏自敘

禹貢集釋卷之一

淮安山陽丁晏學

虞夏書

馬融鄭康成王肅劉向別錄

禹名也

顧炎武

上古淳樸無嫌於名

孔疏胡渭

賦者自上稅下

之名貢者從下獻上之稱
賦者自上稅下

張九成

安居樂土自然懷報上之心以其所有獻於上故謂之

貢以言名雖曰賦非強爲科率民之願輸亦若貢物然

此所以統名之曰貢也

張九成

序禹別九州隨山濬川任土作貢

任土謂定其肥磽之所生

鄭康成

禹敷土

史記夏本紀作傅土鄭注大司樂亦作傅土

敷分也

馬融布也

鄭康成

禹分布治九州之士

傳

首言敷

土見禹之胸中先有一定之規模然後用功所以有成

呂祖謙

蔡傳本張子韶說以敷爲分別非

隨山刊木

漢志作栞顏云古刊字淮南修務訓亦作栞說文作栞云槎識也讀若刊史記隨作行刊作表

隨州中之山而登之除木爲道以望觀所當治則規其

形而度其功

鄭康成

隨行山林

傳

山行多迷刊木以表之

且以通道

蘇軾

奠高山大川

史遷說奠爲定

奠定也形勢以山川爲定山川以其高且大者爲主藥氏
高山山之會也大川所以紀理衆小水也黃度州縣之
設有時而更山川之形千古不易所以禹貢分州必以

山川定疆界

鄭樵

大傳說高山大川五嶽四瀆之屬馬融曰定其差秩
祀禮所視也書傳蔡傳同此說今不从

冀州

史遷說禹行自冀州始

堯所都也

傳

兩河間曰冀州不書其界者時帝都之使

若廣大然

鄭康成

堯水河爲患最甚河行冀兗爲多而青

徐其下流被害尤甚堯都於冀故禹行自冀始

蘇氏冀州

今山西之太原平陽汾州潞安大同五府澤遼沁三州

直隸之順天永平保定廣平順德宣化六府及真定河間二府西北境大名府濬縣西境

盛京之錦州府河

南之懷慶衛輝彰德三府其北直抵塞外陰山下西起

東受降城今蒙古名薩爾瓦村之北東訖於大遼水也

地理釋今

傳云此州帝都不說境界以餘州所至則可知蔡傳

同胡渭依其說今不从

旣載壺口治梁及岐

先儒讀旣載爲句馬融曰載載于書也今從蘇氏說讀旣載壺口爲句

載之言事事謂作徒役也地理志壺口在河東北屈梁

山在左馮翊夏陽岐山在右扶風美陽西北於此言治

梁及岐者蓋治水從下起以襄水害易也

鄭康成

壺口在

冀州梁岐在雍州從東循山治水而西

傳

其先河出孟

門之上橫流而出則知壺口梁岐皆墊於水矣禹於壺

口之西闢孟門於梁山之北闢龍門而其餘功又及岐

山焉蓋壺口梁岐一役也其施功皆同時不可分言於

二州故並言於冀也

曾氏

壺口今山西平陽府吉州西

南七十里有壺口山黃河之水注其中如壺然梁岐今

陝西西安府韓城縣西北九十里之梁山鳳翔府岐山

縣東北四十里之岐山也

地理今釋

冀州有三壺口一在吉州西南禹貢之壺口也一爲

汾陰縣西南之平山平水所出亦名壺口山水經汾
水注誤以爲尙書之壺口一在長治縣東南左傳哀
四年取壺口杜注潞縣東有壺口關卽今潞城縣關
以山爲名此二者皆非禹貢之壺口也

雍州有二梁山一在韓城縣西北詩所云奕奕梁山
禹貢之梁山也一在乾州西北西南接岐山縣界卽
孟子所云踰梁山元和志誤以爲治梁之梁非禹貢
之梁山也

蔡傳疑雍州之山不當載於冀州从晁以道說以爲
呂梁狐岐指今山西汾州府永寧州東北之呂梁山

一名骨脊山爲梁山汾州府孝義縣西之狐岐山一名薛頡山爲岐山然二山去河甚遠不得謂河水所經

既修太原至于岳陽

岳陽縣太岳之南於地理志太原今以爲郡名

今山西太原府

太岳在河東故縣號東

縣今山西霍州太岳在州東三十里

名霍太山

鄭康成高平曰太原山南曰陽

傳

太原汾水之所出岳陽

汾水之所經道汾水故也

曾氏

傳言禹能修鯀之功蓋有

因而修之者焉

葉氏

岳陽凡太岳山南皆是其地當直抵

南河

胡氏

凡既字皆據成功言工力創造曰治沿緒曰修

道里附近曰及總括曰至皆書法也

茅瑞

太原在平陽東北左傳臺駘能業其官以處太原卽書所謂太原矣亦謂之大齒春秋昭元年晉敗狄於大齒三傳皆作大原穀梁云中國曰太原夷狄曰大齒又謂之大夏史記禹鑿龍門通大夏左傳遷實沈於大夏是也又謂之夏虛左傳命唐叔封於夏虛是也又謂之晉陽左傳晉趙鞅入於晉陽以叛是也蓋皆太原之異名若詩云薄伐玁狁至于太原周語宣王料民於太原顧氏曰知錄謂在今平涼後魏立爲原州朱子呂東萊嚴粲以爲太原陽曲縣誤也

覃懷底績至于衡漳

史遷說底績爲致功

懷縣屬河內

今河南懷慶府地

衡漳者漳水橫流入河

鄭康成

覃

懷二字共爲一地衡卽古橫字地理志清漳水出上黨

沾縣

沾縣今山西平樂縣

濁漳水出長子縣東

今潞安府長子縣

至鄴縣

今臨漳縣西有鄴縣故城

入清漳孔

覃懷平地也懷襄之時平地致

功爲難故曰底績

曾氏

冀州三面距河河爲大患故禹所

治自壺口至衡漳皆所以治河之害與夫別流之入於

河也

夏侯儀

厥土惟白壤

壤天性和美也

馬融

水去土復其性色白而壤

傳

書傳無塊曰壤顏師古曰柔土曰壤鄭注周禮十有二壤曰壤亦土也變文耳

厥賦惟上上錯

地有上下相錯通率第一

馬融此州入穀不貢鄭康成錯雜

也此州先賦後田殊於餘州不言貢篚亦差於餘州
冀州賦先於田王畿千里之地并與園廛漆林之類而
征之賦非盡出於田也冀州不言貢篚天子封內無所
事於貢也

林氏

僞孔傳謂錯出第二之賦蘇氏謂賦田出粟米兵車
指軍賦言蔡傳並从之今不取

厥田惟中中

田著高下之等者當爲水害備也

鄭康成

田之高下肥瘠

九州之中爲第五

傳

田賦之等不同賦之九等以各州

歲入總數較其多寡而爲高下也數之最多者爲上上

田之九等以各州土地所宜較其肥瘠而爲高下也地之最肥者爲上上

吳澄

恒衛既從大陸既作

史遷恒作常

地理志恒水出恒山

桓山在今直隸定州曲陽縣

衛水在靈壽

今正定府

靈壽縣大陸澤在鉅鹿爾雅釋地八敷晉有大陸

鄭康成今

鉅鹿縣廣河澤是也廣平曰陸

孫炎

大陸之地已可耕

作傳

班志謂恒水出常山上曲陽縣東入滹沱衛出常山靈壽縣東入滹沱胡渭謂恒卽滹沱衛卽滹沱古今異名今不从

冀州有三大陸漢志鉅鹿禹貢大陸澤在北呂氏有始覽云趙之鉅鹿高注廣阿澤也大陸澤在今直隸順德府鉅鹿任縣及趙州隆平縣界此禹貢之大陸也呂覽九敷又云晉之大陸注云魏獻子所居左傳定元年魏獻子田於大陸杜預謂吳澤陂近寧在今河內修武縣淮南子亦分大陸鉅鹿爲二敷水經濁

漳水注謂自甯迄於鉅鹿出於東北皆爲大陸合大陸鉅鹿爲一非也水經注又謂呂氏春秋大陸卽鄒澤在今太原介休縣界二者皆非禹貢之大陸也

蔡傳引程大昌大陸非鉅鹿廣阿鉅鹿去古河遠大陸者四無山阜曠然平地杜佑李吉甫以爲邢趙深三州之地今不从

島夷皮服夾右碣石入于河

史記漢書並作烏夷河史記作海

鳥夷東北之民賦食鳥獸者

鄭康成傳地理

志漁陽驪城自注大碣石山在縣西南遼西紫縣自注

有碣石水南入官

班固傳碣石山在遼西臨渝縣南水中

水經

禹貢山水澤地所在

碣石在臨渝或云無此山也

山海經

碣石山

郭注

碣石山

負海當河入海之衝自海道夾出碣石之右然後入河而達帝都也

朱子

賈讓言破碣石碣石類底柱橫絕中流當河之衝者也破之不容已矣碣石本在臨渝海中昔

有而今亡

胡渭

案說文碣特立之石東海有碣石山漢書武帝紀東巡海上至碣石文頴曰在遼西絫縣絫縣今罷屬臨渝此石著海旁水經注大禹鑿其石夾右而納河秦始皇漢武帝皆嘗登之海水西侵歲月逾甚而苞其山故言水中矣又河水注云河之入海舊在碣石今

川流所導非禹瀆也張君云碣石在海中蓋淪於海水也後魏志碣石在肥如隋志北平盧龍縣臨渝宮有碣石案碣石當在今永平府昌黎縣漢素縣地永平府又有臨渝縣又盧龍縣有肥如故城樂亭縣有驪成故城今皆屬永平府地並相近實一山也

案正義孔讀鳥爲島康成云鳥夷東方之民搏食鳥獸者也王肅云鳥夷東北夷國名也是史遷班固康成王肅並作鳥夷釋文引馬云島夷北夷國馬融本作鳥與王注祠其作島者後人改也顏師古漢書注云此東北之夷搏取鳥獸食其肉而衣其皮也自爲

孔傳訓鳥夷爲海曲唐石經直改經作島古經遂失其真集韻二十二皓島古作鳥羣經音辯鳥部鳥海曲也當老切書鳥夷是北宋孔傳本猶有作鳥字者又漢志鳥夷卉服師古曰鳥夷東南之夷善捕鳥者也史記于揚州作島夷前後不符明爲後人竄改也總之經文本作鳥夷卽訓海曲亦不當改作島字案碣石之說不一鄭康成云戰國策碣石在九門縣今屬常山郡蓋別有碣石與此同名今驗九門無此山也九門今正定府藁城縣今戰國策亦無此文王充耘謂今合口御河

入海處北岸有石山聳立狀如小孤山俗呼爲碣石

古人嘗鐫銘其上王伯厚謂在高麗界者爲左碣石
在平州南者爲右碣石金吉甫謂左碣石在高麗而
沙門島對岸之鐵山當渤海之口者爲禹貢之右碣
石不獨於古無稽並以右字屬下讀於經文亦戾矣
郭造卿碣石叢談以昌黎縣北十里仙人臺當之劉
世偉以馬谷山爲碣石顧亭林肇域志亦云濟南府
海豐縣有馬谷山卽古之碣石地理今釋取之其說
不一難以信從今从漢志

釋文夾帶也蘇氏曰夾掖也自海入河逆流而西右
顧碣石如在掖腋也

濟河惟兗州

漢書濟作沛史記兗作沂

東南據濟西北距河

傳

言兗州之界在此兩水之間

鄭氏

河患惟兗爲甚兩岸無山皆是平地所以潰決禹自其

決處導之用工尤難

朱子

兗州今山東東昌府及兗州府

曹州陽穀壽張鄆城三縣濟南青州二府西北境直隸

大名府及真定河間二府東南境河南衛輝府胙城縣

地理今釋

說文水部沇水出河東東垣王屋山東爲沛古文作

沿沛沇也東入于海顏師古云沛本濟水之字從水

弔聲說文濟水出常山房子縣贊皇山沛正字濟借

字當依漢志爲正

九河既道

九河名徒駭太史馬穎覆釜胡蘇簡絜鉤盤鬲津

馬融周

時齊桓公塞之同爲一今河間弓高以東至平原鬲津

往往有其遺處

鄭康成

河水分爲九道

傳

九河簡絜爲二自郭璞孫炎李巡孔穎達並同蔡傳

據曾氏之說合簡潔爲一河其一則河之經流也林

之奇謂九河勢均安得以一爲經流入爲支派哉駁

之甚當

漢溝洫志許商言古說九河之名有徒駭胡蘇鬲津

今見在成平東光禹界中自南以北至徒駭間相去
二百餘里今河雖數移徙不離此域平當云九河今
皆竄滅馮逡云九河今既滅難明王橫云九河之地
已爲海所漸水經漳水注九河既播八枝代絕遺跡
故稱往往時存杜佑通典於許商所得之外又得其
三鉤盤在景城郡界馬頰覆釜在平原縣界惟太史
簡絜三河未詳處所史記正義云簡在貝州厯亭縣
界金地理志南皮縣有潔河明一統志太史河在南
皮縣北以漢人所不能知而一一考之詳悉今所不

取

漢書勃海郡咸平縣自注虧池河民曰徒駭河東光
縣自注有胡蘇亭平原郡鬲縣自注平當以爲鬲津
般縣顏注引九河鉤般爲說敘傳自茲距漢北亡八
支其一存者卽是徒駭孔疏徒駭是河之本道東出
分爲八支本此班孟堅以徒駭爲虧池漢世近古必
有所據且以徒駭在成平亦與許商合也書疏徒駭
今在成平東光縣今有胡蘇亭亦本漢書

又樂史以馬頰爲篤馬河案溝洫志孫禁欲開篤馬
河許商謂孫禁所欲開者在九河南則篤馬河非九
河之迹樂史失之

公羊疏引尙書中候云齊桓之霸過八流以自廣書
疏引春秋緯寶乾圖云移河爲界在齊呂墳過八流
以自廣鄭注本此水經河水五亦云齊桓霸世塞廣
田居同爲一河爾雅釋文引郭璞音義云周時齊桓
公塞九河並爲一自鬲津以北至徒駭二百餘里渤海
東莞成平平原河間弓高以東往往有其處焉亦
本鄭說

後漢書袁紹傳公孫瓚還屯槃河注云故河道在今
德州昌平縣界入滄州樂陵縣今名枯槃河太平寰
宇記滄州樂陵縣鉤盤河在縣東南五十里

揚雄兗州箴九河既導漢書注一說道讀曰導導治
也今不从

雷夏旣澤灘沮會同

灘史記漢書作雍

雍水沮水相觸而入此澤中地理志曰雷澤在濟陰成

陽

鄭注今山東東昌府濮州東南有雷澤接曹州界

洪水之時高原亦水澤不

爲澤雷夏旣澤高地水盡此復爲澤也

正義

灘水沮水二

源俱出雷澤縣西北平地去縣四十里雷夏澤在縣北

郭外灘沮二水會同此澤

元和郡志

案水經注瓠子河東逕雷澤北澤在大成陽故城西北十餘里其陂東西二十餘里南北十五里卽舜所

漁也

蔡傳引山海經澤中有雷神龍身而人頭鼓其腹則雷今所不取

爾雅釋水水自河出爲灘郭注引書灘沮會同又釋

水濟爲澨晁氏曰沮有澨音二水河濟之別也案說

文河灘水在宋又云汎水至蒙爲灘水汎在豫州與

禹貢兗州無涉水經汎水下引爾雅濟別爲澨與禹

貢之沮益無涉史記正義引括地志雷夏澤在濮州

雷澤縣郭外西北灘沮二水在雷澤西北平地元和

寰宇志並同王晦叔引九域志濮州有沮溝卽灘沮

會同當據以釋禹貢蔡傳引曾氏晁氏之說失之

周禮兗州其浸盧維鄭注當作雷雍引此雷夏既澤

蓋以雷爲雷澤雍爲灘水也鄭說確不可易
桑土既蠶是降邱宅土

其地尤宜蠶桑今濮水之上地有桑間者水害旣除於
是下邱居土以其免於尼尤喜故記之

鄭康成

衛得桑土之野楚邱帝邱旄邱皆是也其詩曰降觀
于桑說于桑田兗州境又有瑕邱廩邱敵邱皆在濮
水之濱雷夏灘沮皆在濮州境故桑土旣蠶繼言之
厥土黑墳厥草惟繇厥木惟條

墳有膏肥也繇抽也馬融條長也傳水土平草木亦得遂
其性

林氏

漢地理志壞墳應劭讀墳爲肥墳肥一聲之轉馬義得之爲傳謂色黑墳起非也傳又訓繇爲茂今並不从

厥田惟中中厥賦貞作十有三載乃同

載史漢馬鄭並作年

貞正也治此州正作不休十三年乃有賦與八州同言

功難也

鄭氏諸州賦無下下貞卽下下爲第九也

正義充當

河下流之衝被害尤劇必作治十有三載然後賦法同於他州

蔡傳因其受患之深所以優恤之至王充袁

馬融謂十三年而兗州平以爲禹治水之年今不取載當依史漢馬融作年其作載者泥唐虞曰載之文

東晉古文竄改也

厥貢漆絲厥篚織文

籩漢書作棐

貢者百工之府受而藏之其實於篚者入於女功故以

貢篚別之

鄭氏充地宜漆宜桑故貢漆絲

蔡傳織文織而有

文者也

正義綾羅之屬

吳氏

吳氏謂染其絲五色織之織貝不染五色而織之成
文曰織文孔傳謂織文錦綺之屬非也漆當爲棗此
段漆水字篚依說文當作匪

浮于濟漂達于河

漂說文作漂當从之

舟行水曰浮充之貢浮濟浮漂以達于河帝都冀州三

面距河達河則達帝都矣蔡氏因水入水曰達傳灤水出東郡東武陽入海桑欽云出平原高唐論今曹州府朝城縣有東武陽城

漢志東郡東武陽自注禹治灤水東北至干乘入海過郡三行于二百里干乘郡有溼沃縣灤水所經故名溼卽濕字之訛也水經注作灤沃可證又平原郡高唐自注桑欽言灤水所出又溝洫志禹迺灤二渠以引其河孟康曰灤分也分其流泄其怒也二渠其一出自邱西南南折者也其一則灤川也河自王莽時遂空唯用灤耳史記河渠書作廩二渠灤廩音義

同

又蔡傳誤會程大昌漢河非禹河竟不知漂水所在
陳師凱書傳旁通云程氏之意非指漂爲漢河蓋言
漂入河處所受河水乃漢以後所徙頓邱之河非禹
時澶相以北之河其漂水仍以東武陽爲是且水經
注敘漂水源委極明蔡傳乃以爲未詳何耶

新唐書許敬宗傳高宗問今濟漂不相屬何故敬宗
對曰書言浮汶達濟不言合漂者漂自東武陽入于
乘入海也胡東樵謂濟漂本相通西漢末二水爲河
所隔敬宗憑臆以對未可以證禹貢也

海岱惟青州

東至海西至岱東嶽曰泰山

鄭康成

青州之界從岱山東

厯密州東北厯海曲萊州越海分遼東樂浪三韓之地

西抵遼水也

杜佑

青州今山東登州萊州二府青州府益

都臨淄昌樂安邱壽光臨朐六縣及諸城高苑博興樂
安四縣南境濟南府肥城長清厯城章邱鄒平長山新
城淄川八縣及泰安府萊蕪縣北境兗州府東阿平陰
二縣北境其東北跨海爲盛京奉天府訖於朝鮮國也

地理今釋

嵎夷既略

嵎夷地名馬融卽堯典宅嵎夷是也正義略爲之封畛也蔡氏
王氏地接於夷不爲之封畛則有猾夏之變曾氏碣石之功
畢禹卽東行遼東經略嵎夷然後渡海而南治濰淄二水也胡渭

堯典正義嵎夷尙書考靈曜及史記作禹鍊今史記
五帝紀作郁夷張守節曰郁音隅夏本紀仍作嵎夷
司馬貞曰今文尙書及帝命驗竝作禺鐵在遼西鐵
古夷字也說文土部嵎夷在冀州陽谷引尙書宅嵎
夷山部嵎山在遼西一曰嵎鎭嵎谷金部古文鍊从
夷形相近也

堯典馬融注嵎夷萊夷也又後漢書東夷有九種贊曰宅是嵎夷是以東方九夷爲嵎夷也通典用其說金氏从之薛氏謂今登州之地于欽齊乘又謂甯海州爲禹貢嵎夷今不取

馬融謂用功少曰略傳同案左傳天子經略諸侯正封又曰封畛土略當从蔡傳

濰淄其道

漢書作惟淄頭曰惟字今作維淄字或作淄古今通用也

濰淄兩水名地理志濰水出鄆邪箕屋山淄水出泰山

萊蕪縣

鄭康成注

箕縣今青州府莒州萊蕪今泰安府萊蕪

縣上言既道禹爲之道也此言其道氾濫既去水循其

道也

蔡氏

漢志琅邪郡箕縣自注禹貢維水北至都昌入海過
郡三行五百二十里泰山郡萊蕪縣自注原山淄水
所出東至博昌入沛班志言入沛鄭不引者水經稱
淄水入海是禹時故道不入濟足徵鄭學之核

左傳襄十八年晉師東侵及淄通鑑梁武帝紀魏李
叔仁擊邢果於惟水胡三省注惟當作淄此二者皆
禹貢之淄也淄水卽臨淄之淄尙父所封淄澗之淄
易牙所嘗周禮幽州浸曰淄時皆此水也括地志謂
禹治水功畢土石黑數里之中波若漆當作淄淄爲

正說文無澑字俗加水旁

厥土白墳海濱廣斥

史記作海濱廣潟厥田斥鹵漢書作海瀨廣鴻

斥謂地鹹鹵

鄭氏

說文鹵鹹地也東方謂之斥西方謂之

鹵海畔迥闊地皆斥鹵故云廣斥言水害除復舊性也

正義平地則色白而性墳至于海濱則彌望皆斥鹵之地

斥者鹹土可煮以爲鹽者也

朴奇之

管子曰齊有渠展之鹽注渠展地名沛水入海之處

爾雅十藪齊有海隅郭注以海濱廣斥當之史漢作

廣潟廣韻潟鹹土溝洫志終古烏鹵兮生稻梁卽斥

鹵也濱俗字當作瀨爲正說文瀨水厓也

厥田惟上下厥賦中

用第三賦第四

傳

厥貢鹽絲海物惟錯

綿細葛錯雜非一種

傳海物水族之可食者

林氏貢物不

以精巖爲敘而以多少爲敘青州鹽居多故敘於先也
他放此

蔡元度

宋史食貨志鹽類有二引池而成者曰顆鹽周官所謂
鹽也鬻海鬻井鬻鹹而成者曰末鹽周官所謂
散鹽也康成謂海物海魚也魚種類尤雜然如青州
蟹胥之類皆海物不獨魚也

岱畎絲枲鉛松怪石

釋文徐本作畎谷

畎谷也怪異好石似玉者岱山之谷出此五物皆貢之
傳枲麻也鉛錫也

正義怪石碱硃之屬

釋文

周禮有典絲典枲喪服傳牡麻者枲麻也鹽鐵論曰
古者庶人耋老而後衣絲其餘則麻枲而已是枲賤
於絲也說文鉛青金也詩云徂徠之松徂徠卽岱之
支峰也金吉甫云怪石如今萊之溫石可爲器李時
珍曰紫石英太山所出甚瓊瑋其經之怪石乎

萊夷作牧

史記云爲牧

萊夷萊山之夷也

顏師古可以放牧

傳

今萊州登州二府

皆禹貢萊夷地

胡渭

萊夷卽左傳夾谷之會萊人以兵劫魯侯史記晏平
仲萊之夷維人維卽澠水金吉甫曰萊夷地宜畜牧吳幼
清云作謂耕作牧謂放牧夷人以耕牧爲業分爲二
事與史公云爲牧不如今不从

繫筐繫絲

史記作會絲

繫桑蠶絲中琴瑟弦傳釋木云繫絲山桑郭璞曰柘屬
也繫絲是蠶食繫桑所得絲韌中琴瑟正義繫桑出東萊
以織繪堅韌異常東萊人謂之山繭蘇氏

浮子汝達于濟

漢書作沛

地理志汶水出泰山萊蕪原山西南入濟

鄭康

不言達

河者因於充也

蔡

達濟則河自可達不待復書也

昌

大

汶入濟禹貢之汶論語汶上水經謂之北汶于欽謂

即今大清河與禹貢無涉

海岱及淮惟徐州

東至海北至岱南及淮

傳

七州皆言二至蓋以鄒州互

見至此州獨載其三邊者止言海岱則嫌於青止言淮

海則嫌於揚故必曰海岱及淮而後徐州之疆境始別

也

林氏

徐州今江南徐州府宿遷邳州睢甯及鳳陽府懷

遠五河虹靈璧四縣泗宿二州淮安府桃源清河安東

海州贛榆山東兗州府滋陽曲阜南陽泗水金鄉魚臺
嘉祥鉅野汶上鄒城鄒滕輝費等縣及平陰縣南境濟
甯東平沂三洲濟南府新泰縣及萊蕪縣泰安府南境
青州府莒州蒙陰沂水日照三縣及諸城縣南境地理
淮沂其父史記父作治

二水已治傳地理志沂水出泰山蓋縣今沂水縣西北有蓋縣故城
臨樂子山南至下邳入泗過郡五行六百里淮出桐柏
山發源遠矣於此州言之者淮水至此而大爲害尤甚
喜得其治故於此記之正義

論語浴乎沂逕魯縣故城南北對稷門一名雩門水

經謂出尼邱山西北卽曾點所浴也與禹貢之沂無涉

蒙羽其藝

漢書作藝

二山已可種藝傳地理志蒙山在泰山蒙陰縣西南今

東蒙陰縣羽山在東海祝其縣南今賴榆縣南

祝其故城

詩云藝之荏

菽故藝爲種也

正義

魯頌奄有龜蒙論語東蒙卽此山也焦竑謂殛鯀處下有羽潭卽左傳所云羽淵也然舜典傳謂羽山東裔在海中今登州府蓬萊縣有羽山當是放流之地與蒙羽無涉

大野既豬東原底平

漢書作大墾

史記作既都

大野在山陽鉅鹿北名鉅野澤

今曹州府鉅野縣

東原地名今

東平郡

今東平州卽東原鄭康

水所停止深者曰豬

馬融

底平

者水患已去而底於平也

晁氏

職方氏兗州澤藪曰大野爾雅十藪魯有大野左傳

哀十四年西狩於大野獲麟史記彭越漁於鉅野澤

中元和志大野澤在鉅野縣東五里南北三百里東

西百餘里于欽齊乘云澤卽梁山泊也

厥土赤埴墳草木漸包

埴黏土也

徐廣漸包相包裹也

馬融

釋文埴鄭作𡇔徐鄭王皆讀曰熾正義𡇔埴音義同廣韻𡇔作𡇔云赤土也說文薪草相薪苞也引書此文文選蜀都賦柯葉漸包劉淵林注漸苞相苞裹而同長也與馬義合僞孔傳謂漸進長包叢生蔡傳从之今不取

厥田惟上中厥賦中中

田第二賦第五傳

厥貢惟土五色

徐州貢土五色青黃赤白黑也劉熙土五色者所以爲

大社之封鄭氏

周書作雒解建大社於國中其壝東青土南赤土西
白土北驪土中央疊以黃土韓詩外傳將封諸侯各
取方土苴以白茅以爲社史記正義引太康地記城

陽姑幕有五色土封諸侯錫之茅土用爲社姑幕今
莒州徐州境也漢書武帝賜齊王閔策曰青社燕王
旦曰元社廣陵王胥曰赤社郊祀志元始五年令徐
州牧歲貢五色土各一斗古制猶存

羽畎夏翟

漢書作夏狄釋文夏行雅反

羽山之谷貢夏翟之羽鄭氏釋鳥云翟山雉正義徐州貢此
夏翟之羽有虞氏以爲綾古之車服器用以雉爲飾者

多矣不但旌旄也林氏禹濬畎不遺窮谷以岱畎羽畎知之
茅瑞徵

周禮天官有夏采注夏采夏翟羽色禹貢徐州貢夏
翟之羽染人秋染夏注染五色謂之夏者其色以夏
狄爲飾引禹貢羽畊夏狄古翟狄通用

嶧陽孤桐

地理志嶧山在下邳

今邳州

今下邳西葛嶧山也

鄭氏孤特

也嶧山之陽特生桐中琴瑟

傳

詩云梧桐生矣于彼朝

陽蓋桐之生以向日者爲良必以孤桐者猶言孤竹之

管也

林氏

山陽之桐難得其孤生者尤難得也

陸佃

林少穎謂卽詩鳬繹非也漢志東海郡下邳自注葛嶧山在西古文以爲嶧陽又魯國驥縣自注故邾國嶧山在北應劭曰邾文公卜遷于嶧者也此卽鳬繹之繹嶧繹古字通用與嶧陽無涉

應劭風俗通梧桐出嶧陽山採東南孫枝爲琴聲甚清雅胡東樵謂琴瑟堂上之樂材取嶧桐絃以繫絲蓋其重也

泗濱浮磬

漢志作泗瀨

泗水出濟陰乘氏鄭氏本漢志乘氏今鉅野縣地泗水出魯卞縣故城東南桃墟西北又西逕其縣故城西水經石在水旁水

中見石若水上浮然此石可以爲磬故謂之浮磬正義此州制貢大略供禮樂之用茅氏泗水今出兗州府泗水縣漢下縣地

水經注泗水自彭城又東南過呂縣南水上有石梁焉故曰呂梁晉太康地記曰水出磬石書所謂泗濱浮磬者也括地志亦云泗水至彭城呂梁出磬石今徐州東南六十里有呂梁洪高誘淮南子呂梁在彭城呂縣石生水中禹決而通之蓋卽磬石之所出也白居易華原磬詩序云天寶中始廢泗濱磬用華原石代之詢諸磬人則曰故老云泗濱聲下調不能和

得華原磬考之乃和由是不改今華原又廢而琢磬皆用靈璧石矣

樂具五行金火木土皆有之獨浮磬取於水之精是以五行備而八音諧矣

本顧亭林

淮夷蠔珠暨魚

史漢作泉古暨字

淮水之上夷民獻此蠔珠與美魚也

鄭氏蠔是蚌之別名

正義

說文玭珠也宋宏云淮水中出玭珠玭珠珠之有聲夏書玭从虫賓作蠔釋文蠔字又作玭韋昭薄迷反蚌也周禮玉府注佩玉衝牙蠔珠以納其間大戴禮

保傅作衡牙玳珠玳珠有聲故用以爲佩歟薛士龍
引山海經文鯢之魚是生珠玉今不取蔡傳以爲淮
白魚胡東樵以爲鱣鮒各指一端惟鄭云美魚得之
馬融謂淮夷二水名孔傳同王肅亦以淮夷爲水名
今不取

厥篚元纖縞

纖細也祭服之材尙細

鄭氏

縞細繒

司馬彪子盧賦注

元黑以細

繪染爲黑也

張守節正義

徐水宜染

黃氏

說文繪帛也今之絹也縞本白色六入爲元孔傳元
黑繪縞白繪纖細也以纖字關上下元纖縞爲二物

曾彥和謂黑經白緯爲纖元也纖也縞也爲三物顏師古謂縞鮮支也今並不取

浮于淮泗達于河

古文尙書作達于菏說文引書亦作菏今俗本誤作河耳菏澤與濟水相通徐州浮淮入泗自泗達菏也書達于菏則達濟可知金氏由菏入濟以達于河此徐之貢道也

閭若
纂

說文菏水在山陽湖陸南引禹貢浮于淮泗達于菏水經濟水篇菏水又東過湖陸縣南東入于泗水酈注澤水所鍾也引尙書浮于淮泗達于菏漢志山陽

郡湖陵自注禹貢浮于淮泗達于河水在南莽曰湖
陸應劭曰章帝更名湖陵菏水正在湖陸此河字明
係菏字之誤水在南謂菏水在縣南水經注泗水引
此文作菏水在南可證自程大昌禹貢論據說文以
正經文之誤後人多从之

淮海惟揚州

揚州界自淮而至海以東也鄭氏古揚州境今江甯揚州
廬州安慶池州太平甯國徽州鎮江常州蘇州十二府
滁和廣德三州鳳陽府鳳陽臨淮定遠霍邱盱眙天長
六縣壽州淮安府山陽鹽城二縣河南汝甯府光山固

始二縣光州湖廣黃州府羅田蘄水廣濟黃梅四縣蘄
州廣東潮州府及江西浙江福建皆是也

地理今釋

彭蠡既豬陽鳥攸居

史記豬作都攸作所漢書作道居

彭蠡澤在豫章彭澤西南方謂都爲豬陽鳥鴻雁之屬
隨陽氣南北

鄭氏澤水既豬禽鳥亦得其居止而遂其性

也

蔡傳彭蠡今鄱陽湖夏允彝

林少穎疑陽鳥爲地名如衛死鳥鄭鳴雁之類今不

从

三江既入

漢志會稽郡吳自注南江在南東入海毗陵自注江在

北東入海丹揚郡蕪湖自注中江出西南東至陽羨入
海班固吳卽今吳縣陽羨今宜興縣北江入海在毗陵北
今丹徒縣

司馬彪續郡國志亦从班說盛宏之荊州記曰江出
岷山至楚都遂廣十里名爲南江至尋陽分爲九道
東會于彭澤經蕪湖名爲中江東北至南徐州名爲
北江入海徐楚金說文繫傳江出岷山至楚都名南
江至尋陽爲九道名中江至南徐州爲北江入海楊慎
丹鉛總錄引此爲徐鼎臣注說文誤二說與漢志合孔穎達導江正義
亦依班志今从之南徐州今鎮江府晉太康二年丹徒爲毗陵郡治

水經禹貢山水澤地所在篇中江在丹陽蕪湖縣西南東至會稽陽羨縣入于海北江在毗陵北界東入于海說與班志同污水篇又過毗陵縣爲北江注丹徒縣北二百步有故城本毗陵郡治注又引地理志江水至石城東出逕吳國南爲南江案地志丹揚郡石城下云分江水首受江東至餘姚入海于會稽郡吳下云南江在南東入海本屬二水道元貫穿爲一蓋石城爲南江之始吳縣爲南江之委正與班志相證明也

杜佑通典三江謂北江中江南江也顏監漢志注三

江謂北江中江南江也蘇子瞻曰豫章江入彭蠡而東至海爲南江岷江江之經流會彭蠡以入海爲中江漢自北入江會彭蠡爲北江先儒曾氏程珌易祓夏僎程大昌黃度陳普王充耘鄭曉郝敬章潢皆从蘇說

徐堅初學記引鄭元孔安國注左合漢爲北江會彭蠡爲南江岷江居其中則爲中江故書稱東爲中江者明岷江至彭蠡與南北合始得稱中也胡東樵錐指引此以證蘇說之確今考三江孔傳三江已入致定爲震澤疏引鄭注三江分於彭蠡爲三孔東入海

與初學記所引不合則知徐堅所引者非鄭孔之注也又北江傳云自彭蠡江分爲三入震澤亦與鄭說合惟鄭云入海孔云入震澤爲異又導江孔傳有北有中南可知疏又引鄭云東迤者爲南江徐堅因此造爲北江中江南江之說緣飾已意冠以先儒之名類書中往往有之東樵據初學記而不考正義故誤信之

釋文引吳地記松江東北行七十里得三江口東北入海爲婁江東南入海爲東江並松江爲三江史記正義張守節亦引顧夷吳地記同南齊庾仲初揚都

賦注今太湖東注爲松江下七十里有水口分流東北入海爲婁江東南入海爲東江與松江而三也此皆以松江東江婁江爲三江也蔡傳主庾說而誤爲庾仲初吳都賦失之甚矣

水經污水篇南江則自牛渚上桐水過安吉縣爲長瀆厯湖口東則松江出焉江水奇分謂之三江口毛晃禹貢指南从水經三江口之說

水經污水下篇引郭璞曰三江岷江松江浙江也又郭注山海經云岷山大江所出也竦山南江水所出也岷山北江水所出也三江皆發源於蜀而注震澤

二說不同歸熙用三江論主景純前說

越語三江環之革昭注三江松江錢塘浦陽江也釋文亦引革昭云謂吳松江錢塘江浦陽江也初學記又引革昭說岷江松江浙江亦悉在吳也此卽景純之說徐堅誤以革昭當之總之禹治水時浙江並未施功安得以此爲禹貢之三江耶

虞氏志林松江到彭蠡分爲三道今不从

唐魏王泰括地志謂禹貢三江俱會彭蠡合爲一江

入解

震澤底定

史記作致定

禹貢集釋

卷一

七

地理志會稽郡吳縣具區澤在西揚州數古文以爲震

澤

班固

震澤吳南太湖名

傳

大江之南西偏莫大於彭蠡

東偏莫大於震澤二患既平則揚之土田皆治矣

金甫

吉

三江入海吳越始有可宅之土而水所鍾者獨震澤而

已

蘇氏

周禮職方氏其澤藪曰具區其浸五湖鄭注具區五

湖在吳南賈疏具區卽震澤一也越語韋昭注五湖

今太湖也黃子鴻胡東樵以揚州藪浸同處謂自包

山以西爲西太湖水始淵深自莫釐武山以東松江

笠澤之地水極灘淺古具區震澤之地分藪浸爲二

可備一說

篠簜既敷厥草惟天厥木惟喬厥土惟塗泥

史遷條簜作竹箭敷作布

漢書草

作少

條箭簜大竹也

鄭氏天長也

喬高也

馬融傳塗泥漸洳也

馬融

下地多水其土淖

蔡傳

釋草篠竹箭簜竹說文作箂箭屬小竹也引書箂簜既敷橒字注又引書竹箭始橒卽說夏書之文也

厥田惟下下厥賦下上上錯

田第九賦第七雜出第六

傳

土塗泥故其田下下南方

水淺土薄不如北方地力之厚

王炎

金氏謂古人尙黍稷田雜五種塗泥獨宜稻不利他種故第爲最下賦第七有時雜出於第六則人功亦稍修矣自唐以來江淮之田號爲天下最漕餉皆仰給於東南唐韓愈謂賦出天下而江南居十九顧亭林亦極言江南賦稅之重東南民力之竭東樵之書所爲三致意也

厥貢惟金三品

銅三色

鄭康

僞孔傳金銀銅也古不尙金銀至後世始盛行當日夏時之貢惟白金之銅不當有金銀也僞傳今不取

瑞琨篠簜齒革羽毛惟木

史記作瑞琨竹箭漢書作瑞琨
史漢俱無惟木二字江氏聲云

文衍

瑞琨美石次玉者也

玉

齒象牙革犀皮羽鳥羽毛旄牛

尾木楩梓豫章

傳

說文琨石之美者引虞書揚州貢瑤琨或作瓊班固
馬融俱作瓊寶一字也說文瑞玉之美者詩釋文引
說文作石之美者當从之

鳥夷卉服

漢書作鳥夷

此州下溼故衣草服貢其服者以給天子之官

鄭氏

爾雅釋草云卉草鄭訓草服甚確鄭云給官者卽郊

特牲所云草服也後漢書度尙傳椎髻鳥語之人章
懷注鳥語聲似鳥引書鳥夷卉服則唐時尙有作
鳥夷者自開成石經改作島而古經不可復矣

傳云南海島夷草服葛越正義引吳都賦蕉葛升越
弱子羅紈蘇氏曰島夷績草木爲服如今吉貝木縣
之類蔡傳亦謂今南夷木縣之精好者亦謂之吉貝
以卉服卽下織貝考吉貝之名始見於南史不可以
當織貝之貝今不从

厥篚織貝

貝錦名詩云成是貝錦先染其絲乃織之則文成矣

鄭康

成

傳謂織細紵貝水物分織貝爲二今不从

厥包橘柚錫貢

小曰橘大曰柚其所包裹而致者錫命乃貢言不常傳

橘柚常貢則勞民害物故錫命乃貢

蘇氏

鄭注謂此州有錫則貢之案經納錫大龜錫貢磬錯
豈皆貢錫乎今不从

沿于江海達于淮泗

史漢沿作均達作通

順流而下曰沿沿江入海自海入淮自淮入泗傳此經
蒙徐之文曰達于淮泗則由菏入濟可知也胡渭

釋文沿鄭本作松松當爲沿馬本作均云均平史記
注引鄭云均讀曰沿沿順水行也顏師古曰均平也
一切經音義引三倉云循古文作均與均相近

禹貢集釋卷之二

淮安山陽丁晏學

荆及衡陽惟荊州

荊州界自荆山南至衡山之南

鄭康言陽見其南至山成

南也

正義

荊州今湖廣武昌漢陽安陸荊州岳州長沙衡

州常德辰州寶慶永州十一府郴靖二州施州衛襄陽

府南漳縣德安府安陸雲夢孝感應城應山五縣隨州

南境黃州府黃岡麻城黃陂黃安四縣四川夔州府建

始縣廣西桂林府全州及興安縣越城嶺北境

地理今釋

江漢朝宗于海

江水漢水其流遄疾又合爲一其赴海也猶諸侯之同心尊天子而朝事之鄭氏二水入海有似於朝百川以海爲宗宗尊也傳

鄭又謂荆楚之域記水之義以著人臣之禮疏引周禮春見曰朝夏見曰宗以證宗尊之義

九江孔殷

史記作甚中

地理志廬江郡尋陽自注禹貢九江在南皆東合爲大江班固應劭注云江自潯陽分爲九道正義九江在今江西九江府德化縣城北今名潯陽江卽大江也自湖北興國州界流入逕瑞昌及縣境北又東合彭蠡湖水逕湖

口彭澤二縣入江南境洪亮吉江於此州界分爲九道甚得地勢之中傳

案史記河渠書余南登廬山觀禹疏九江太史公從孔安國傳文亦以九江近廬山則爲尋陽九江無疑漢書司馬相如傳張揖注九江在廬江潯陽縣南皆東合爲大江者續郡國志尋陽南有九江東合爲大江鄭康成孔穎達亦引地理志九江在尋陽杜佑通典九江今潯陽郡西北郭璞江賦流九派乎潯陽蘇味道九江口詩近漱溢城曲斜吹蠡澤隈皆謂尋陽之九江此漢以來相傳之古說也

釋文引太康地記劉歆以爲湖漢九水入彭蠡澤也
漢志豫章郡贛縣注豫章水出西南北入大江雩都
縣下湖漢水東至彭澤入江又鄱陽注鄱水餘汗注
餘水艾縣注修水南城注吁水建城注蜀水宜春注
南水南壁注彭水皆入湖漢以上豫章湖漢鄱餘修
吁蜀南彭爲九水劉子駿所謂湖漢九水入彭蠡澤
指此是漢人所說九江皆在豫章郡也

東樵謂以洞庭爲九江者自宋初胡旦始則宋以前
無是說矣東樵引山海經江淵澧沅之風交瀟湘之
淵是在九江之間以爲九江在洞庭之證然郭注謂

潯陽九江引書九江孔殷則非洞庭明矣太史公不
敢言山海經東樵引以證經失之矣

緣江圖云九江始於鄖陵終於江口會於桑落洲鄂
陵卽武昌縣古荊州之域桑落洲在今九江府德化
縣東北元和志云江州尋陽郡禹貢揚荆二州之境
揚州云彭蠡旣豬今州南五十二里彭蠡湖是也荆
州云九江孔殷今州西北二十五里九江是也彭蠡
以東爲揚州界九江以西爲荊州界此說核矣

水經注江水篇缺佚不完淮水注秦立九江郡治壽
春縣兼得廬江豫章之地故以九江名郡是卽尋陽

之九江矣水經禹貢山水澤地所在云九江在長江下雋西北江水篇江水又東至長沙下雋縣北澧水沅水資水合東流注之湘水從南來注之注云凡此諸水皆注於洞庭之陂曾彥和謂沅漸元當作無卽爲元辰敘酉湘資醴水皆合洞庭中東入于江是爲九

水字說

江宋胡旦晁以道傅寅毛晃朱子蔡傳並主洞庭之說金履祥陳櫟亦同卽今洞庭湖也胡東樵亦以九江爲洞庭非古義也全謝山曰東樵於九江深信長沙下雋之說不知非水經之本文乃後世所竄入也顧宛溪方輿紀要言九江主湘江皆未當

釋文引潯陽地記云一曰烏白江二曰蚌江三曰烏江四曰嘉靡江五曰畎江六曰源江七曰廩江八曰提江九曰箇江孔疏潯陽記九江名起近代義或當然史記索隱引尋陽記源江作沙江餘同程大昌禹貢論引張僧監尋陽記烏江蚌江作曰申曰烏蚌餘並同程氏禹貢論云樂史寰宇記李宗諤九江圖經亦皆本僧監所記

釋文又引張須元緣江圖云一曰三里江二曰五州江三曰嘉靡江四曰烏土江五曰畎江六曰白烏江七曰箇江八曰沙提江九曰廩江禹貢論引賈耽說

江有八洲曰沙曰人曰九江曰葛曰象曰鳥曰感曰
蚌此八洲者曲折而與江爲九說各不同要皆後人
命名非禹時所有也

史公訓孔殷爲甚中蓋古文說鄭君謂九江從山谿
所出其孔衆多以孔爲孔竅之孔亦爲異義

沱潛既道

史記潛作涔漢書作瀘師古音落

釋水云水自江出爲沱漢爲潛鄭氏地理志南郡枝江下

故羅國江沱出西東入江師古曰沱卽江別出者也

班固

潛水在今湖北安陸府潛江縣傅寅胡渭地理志及鄭皆以

荆梁二州各有沱潛正義據爾雅凡水之出于江漢者皆

有此名出于荆者荆之沱潛也出于梁者梁之沱潛也

林少

案沱有二水經禹貢山水澤地所在荊州沱水在南
郡枝江縣今湖北荊州府有枝江縣縣東有百里洲
王氏炎曰土人謂枝江縣百里洲夾江沱二水之間
其與江分處謂之上沱與江合處謂之下沱此荊州
之沱也水經又云益州沱水在蜀郡汶江縣西南其
一在郫縣西南皆還入江江水注云江水逕汶江道
又有湔水入焉江水又東別爲沱書疏引郭璞爾雅
音義云沱水自蜀郡都安縣擗山與江別更流此皆

梁州之沱也

傅氏集解曰乾德中以漢江陵縣地置潛江縣在荆
南東北百有餘里或者水有自漢而來名之曰潛胡
氏錐指曰承天府志曰

安陸府明嘉靖屬承天府

漢水自鍾祥縣

北三十里分流爲蘆伏河經潛江縣東南復入于漢

卽古潛水也此荊州之潛也書疏引郭璞爾雅音義

有水從漢中沔陽縣南流至梓潼漢壽入大穴中通

峒山下西南潛出一名沔水舊俗云卽禹貢潛也史

記正義引括地志潛水一名復水今名龍門水源出

利州縣谷縣東龍門山大石穴下元和郡縣志縣谷

縣潛水出縣東北龍門山書曰沱潛旣道是也蜀都賦演以潛沫劉淵林注禹貢梁州云澑潛旣道有水從漢中汚陽縣南流至梓潼漢壽縣入穴中通岡山下西南潛出今名復水舊說云禹貢潛水也漢壽縣今四川保甯府廣元縣潛水在縣北此梁州之潛也又案馬融云沱湖也其中泉出而不流者謂之潛此別一義

疏引鄭云今南郡枝江縣有沱水其尾入江耳首不於江出也華容夏水首出江尾入汚蓋此所謂沱也潛則未聞象類鄭以華容夏水爲沱自別一義蘇武

从之至荊州之潛東樵錐指以潛江縣當之然此縣至宋始名潛江究非確義蔡傳謂潛水未有見鄭君闕如得之

漢志作瀘漢中郡安陽縣自注鬻谷水出西南北入漢師古曰鬻音潛其字亦或从水水經涔水出漢中南鄭縣東陽旱山北至安陽縣南入于沔史記亦作涔涔潛一字通用史記梁州沱涔旣道索隱曰涔亦作潛沱出蜀郡鄆縣西東入江潛出漢中安陽縣西北入漢蘇氏曰鄆縣沱水安陽潛水梁州之沱潛也皆謂潛在安陽今陝西漢中府城固縣涔水在縣南

以此爲梁州之潛亦漢以來相傳之古義康成注漢中安陽有潛水其尾入江漢耳首不於此出鄭謂潛至巴郡江州入江漢志巴郡宕渠縣有潛水西南入瀘水經潛水出巴郡宕渠縣又南入於江蔡傳據以釋經東樵駁之

雲土夢作乂

史記作雲土夢爲治漢志雲夢土作乂

雲夢之作水去可爲耕作畎畝之治

傳江漢九江沱潛

之功畢則水去而雲夢之土已耕治也

胡渭

沈括夢溪筆談云舊尚書禹貢云雲夢土作乂太宗皇帝時得古本尚書作雲土夢作乂詔改禹貢從古

本考漢書雲夢土作乂於文爲順

胡東樵謂太宗此一改殊多事不若仍舊之爲得但沈括稱太宗皇帝係宋太宗東樵謂唐太宗甚誤邵氏爾雅正義亦謂唐人改雲土夢作乂誤亦如之

又按錐指引筆談云石經倒土夢字今案筆談無此語唐開成石經亦作雲土夢作乂東樵謂從石經本則傳云澤中有土義甚愜當此石經不知何據殆誤引歟

又案作雲土夢不始於宋初之改本孔穎達正義一經之土字在二字之間蓋史文兼上下也則唐人

然水經汚水注亦引雲土夢作义疑古文孔傳本如是宋太宗所得古本尙書卽東晉古文書所云舊尙書作雲夢蓋馬鄭舊本也

雲夢諸書有合稱者周禮職方爾雅十數呂覽淮南同戰國策楚王游於雲夢宋玉高唐賦楚襄王與宋玉遊於雲夢之臺此合稱雲夢者也有單稱雲者左傳定四年楚子涉睢濟江入於雲中楚語雲連徒洲是也有單稱夢者宣四年棄子文於夢中昭三年楚子以鄭伯田江南之夢宋玉招魂曰與王趨夢兮課後先是也或合稱連文或單稱省文雲夢一而已自

沈括羅泌等創江南爲夢江北爲雲之說蔡傳分爲二澤雲土者雲之地土見而已夢作父者夢之地已可耕治也其說支矣

司馬相如子虛賦雲夢者方八九百里水經禹貢山水澤地所在云雲夢澤在南郡華容之東漢志南郡華容縣雲夢澤在南荊州轟鄭注職方應劭風俗通高誘呂覽淮南子注韋昭國語注俱本班志華容在今荊州府監利石首二縣水經夏水東逕監利縣西南自州陵東界逕於雲杜沌陽爲雲夢之轟杜預曰枝江縣安陸縣有雲夢元和志雲夢澤在安陸縣

南五十里雲夢澤在雲夢縣西七里胡渭謂東抵漸
州西抵枝口京山以南青草以北皆爲雲夢

郭注爾雅云今南郡華容縣東南巴邱湖是也徐堅

初學記雲夢澤一名巴邱湖案青草湖卽巴邱湖水
漲時與洞庭爲一邵氏簡端錄雲夢蓋兼洞庭有之
孫星衍今古文疏謂澤卽洞庭湖近是

厥土惟塗泥厥田惟下中厥賦上下

田第八賦第三傳土雖與揚州同而地勢稍高故田加
於揚州一等

林氏

厥貢羽毛齒革惟金三品

史記毛伯施

土所出與揚州同傳揚州先齒革此州先羽毛蓋以善者爲先正義職方荊州其利丹銀齒革楚語楚之所寶齒角皮革羽毛所以備賦用以戒不虞者也左傳晉重耳對楚子曰羽毛齒革君地生焉荀子曰楚人鮫革犀兕以爲甲鞞如金石觀於此信惟荆產最良也胡渭

純幹枯柏

純木似樗而實顏師古純與椿同胡渭幹枯柏葉松身曰枯鄭氏

純說文云木也或作櫟櫧純也考工記鄭注引此櫟幹枯柏郭璞注中山經云櫟木似樗樹材中東轅純

又作椿李時珍本草椿樗栲一木而三種樗栲皆不
材之木不似椿堅實可入棟梁也胡東樵謂柧作櫟
蓋椿葉香故從熏柧之爲椿明矣

正義曰周禮弓人取榦之道七柘爲上知此榦是柘
也金氏曰榦材中弓弩之榦周官所謂荆之榦是也
爾雅釋木云檜柏葉松身栝檜聲近字通

礪砥砮丹

漢書作厲

礪磨刀石也精者曰砥

鄭氏砮石中矢鏃丹朱類傳

說文礪旱石也底柔石也或作砥郭璞注西山經云
精爲砥粗爲厲也正義曰魯語肅慎氏貢砮矢石砮

賈逵曰砮矢鏃之石也丹者丹砂蘇子瞻石砮記余自儋耳北歸江上得古箭鏃梨鋒而劍脊其廉可剗而其質則石此卽所謂楨矢蘇頌圖經木草曰丹砂今出辰州

惟箇砮楨三邦底貢厥名

史記作致貢其名

箇砮聆風也竹有二名或大小異焉鄭氏楨木名可以爲箭馬融箇砮楨三物皆出雲夢之澤近澤三國皆致貢之

其名天下稱善

傳

廣雅釋草云砮箭也呂覽本味篇注箇竹箭也史記集解引鄭注作砮風廣韻砮竹名文選長笛賦特箭

葉而莖立今獨聆風於極危是聆風可爲箭也

蔡傳謂三邦未詳其地林少穎以爲紛胡之筈毛晃
指南云荊州蠻荆楚三國今不从呂氏謂純幹及榜
十物使貢其名鄭氏以厥名屬下讀厥名包匱今皆
不取

包匱菁茅

匱纏結也菁茅茅有毛刺者給宗廟縮酒重之故包裹
又纏結也鄭氏揚州先籠後包此先包後籠者以菁茅祀
貢重物包而且匱故升在籠前吳氏古人樽酒不以絲帛
而以編茅王室祭祀之酒則以菁茅取其至潔也朱子

傳云匱匣也菁以爲菹茅以縮酒說文蓋古文作匱
黍稷方器也吳都賦職貢納其包匱劉淵林注匱猶
結也菁茅生桂陽可以縮酒旣包裹而又纏結之與
鄭義同一曰匱柙也卽孔傳義傳以菁茅爲二物疏
引周禮菁菹今不从傳又以包爲包橘柚尤臚說也
顏師古曰匱匣也菁菜也从孔說

厥篚元纁璣組

此州染元纁色善故貢之傳璣珠不圓者組綬屬說文玉
藻說佩玉所懸者皆曰組綬是組綬相類之物也正義組以幾穿結爲組也吳澄

九江納錫大龜

史記納錫爲入賜

尺二寸曰大龜出於九江水中龜不常用錫命而納之

傳納入也

馬融

白虎通引禮三正記天子龜長一尺二寸漢食貨志元龜距鬚長尺二寸蘇氏謂有則納之若以下錫上者不在常貢之列蔡傳及錐指取之今不从

浮于江沱潛漢逾于洛至于南河

史記潛作濱漢書作潛

逾越也河在冀州南東流故越洛而至南河傳王氏凡日逾皆水道不通遵陸而後能達也炎漢與洛不相通故曰逾于洛自洛以至豫州之河故曰至于南河曾氏

荆河惟豫州

西南至荆山北距河水

傳河南河也其不言南者蒙上

至于南河省文而可知也

謂胡州今河南開封歸德南

陽汝甯五府汝州直隸大名府東明長垣二縣山東兗

州府定陶城武曹單四縣江南鳳陽府潁亳二州潁上

太和蒙城三縣湖廣襄陽府襄陽光化宜城棗陽穀城

五縣均州鄖陽府鄖保康二縣及鄖西縣東境德安府

隨州北境

地理今釋

伊洛瀍澗既入于河

地理志宏農郡盧氏今河南府盧氏縣自注伊水出東

北入雒過郡一行四百五十里又上雒自注禹貢雒水

出冢領山

今陝西商州冢嶺山

東北至鞏

今河南府鞏縣

入河過郡二行

千七十里豫州川河南郡穀城

今洛陽府西北穀城山

自注禹貢

瀍水出簪亭北東入雒

宏農郡新安

今河南府新安縣

澗水

自注禹貢

澗水在東南入雒

班固

澗池縣界白石山

自注禹貢

澗水入洛合流而

入河言其不復爲害也

正義

孔傳伊出陸渾山洛出上洛山澗出澗池山瀍出河

南北山今不取

瀍字淮南本經訓作瀍澗不从水

榮波既豬

史記作榮播既都

滎播澤名

馬融

沈水溢出河爲澤也今塞爲平地滎陽民

猶謂其處爲滎播在其縣東春秋魯閔公二年衛侯攻
狄人戰于滎澤此其地也

鄭氏

沈水入河溢爲滎滎是澤

名

正義

今河南開封府滎澤縣

胡謂

書疏云馬鄭皆作滎播史記索隱云今文並云滎播

周禮職方氏其浸波溠注波讀爲播引禹貢滎播既

都水經注引闢駁曰滎播澤名又引呂忱曰播水在

滎陽滎播是一澤當作播爲是僞傳旣改爲波顏師

古林之奇又以滎波爲二水蔡傳因之今不取

說文潘水名在河南滎陽潘播形相近卽此水也

導菏澤被孟豬

史記作被明都漢志作明豬

地理志濟陰郡禹貢荷澤在定陶東屬兗州

五經文字
見夏書

古本亦作荷釋文荷徐音柯又工可反班志
作荷顏監音柯失之今曹州府有定陶縣

東梁國睢

陽

今河南商邱縣

禹貢盟諸澤在東北

班固

言治荷澤之水衍溢

則使被及孟諸不常入也

顏師古

自荷澤至孟諸凡百四

十里二水舊相通

金氏

說文菏澤水在山陽胡陵孔傳亦云在胡陵而班志謂在定陶傳同叔曰在定陶者其澤也在胡陵者其流也實一水也水經注云菏濟別名也菏澤爲濟水之所經因而導之所以殺濟濱之勢也

周禮青州澤藪曰望諸爾雅十藪宋有孟豬左傳稱
孟諸之麋孔穎達云聲轉字異正是一地也今歸德

府商邱虞城縣界有孟諸臺

厥土惟壞下土墳壚

高者壞下者墳壚

傳壚疏也

鄭氏壚黑剛土也

說文黑土曰

壚

王說文黑土曰

壚然解散也

釋名壞則爲沃

墳壚則爲瘠

王說文炎

厥田惟中上厥賦錯上中

田第四賦第二又雜出第一

傳

厥貢漆枲絲紝

史記枲作絲

職方氏豫州其利漆枲

林紝織屬

說文織紝爲布及練也

顏
古

左傳子產獻紵衣杜注鄭地貴紵毛詩可以灑紵陸
璣疏紵亦麻也

獻篚纖綯史記作其篚纖綯矣

續繫也說文細綸傳

案傳以纖爲細故訓細綸卽今之絲綸也林氏以綯
續爲二物胡渭謂纖亦綯也今不取

錫貢磬錯

治玉石曰錯治磬錯也

傳必待上之命而後貢林氏

郊特牲云擊玉磬諸侯之僭禮也詩那箋玉磬尊故

異言之類監謂亦待錫命而貢是也

浮于洛達于河

漢書作入于河史記作雒

魏州去帝都甚近浮舟于洛則達于河則達于

帝都矣

林氏

豫之東境徑自入河豫之西境則浮于洛而

後至河也

蔡傳

華陽黑水惟梁州

梁州界自華山之南至于黑水

郭氏

華山之陰爲雍州其

陽爲梁州

曾氏

黑水今瀘水也

薛士龍

漢志犍爲郡南廣汾

關山符黑水所出北至僰道入江

通典引顧野王與地記

班固今敘州府南溪即漢僰道南廣地

黑水至僰道入江

通典引顧野王與地記

梁州自有黑水爲界與

導川之黑水不相涉

韓汝
節

梁州黑水卽今雲南金沙江

其源發于吐番入雲南麗江府亦曰麗水

地理
今釋
梁州今

陝西漢中府興安州西安府商州雒南山陽鎮安商南

四縣鞏昌府兩當鳳文成四縣徽階二州湖廣鄖陽府

房竹山竹溪三縣及鄖西縣西境四川成都保甯順慶

龍安馬湖五府潼川嘉定邛眉雅五州及敘州重慶夔

州三府瀘州江北諸州縣松潘建昌二衛彝漢營黎大

所天合六蕃招討同是也

同上

胡渭曰山海經黑水之間有若水地理志瀘地縣有
黑水祠水經注自朱提至僰道有黑水今瀘水西連

若水南界漢池東經朱提僰道其爲梁州之黑水無
疑矣東樵又謂漢時名瀘水唐以後名金沙江地理
今釋瀘水麗江源異而流同實一水也

杜佑通典論黑水云孔鄭通儒莫知其所或是年代
久遠遂至湮沒無以詳焉

孫星衍曰水經汚水東過南鄭縣南注云漢水又東
黑水注之水出北山南流入漢庾仲雍曰黑水去高
橋三十里諸葛亮牋云朝發南鄭暮宿黑水西五十
里卽此水史記正義引括地志云黑水源出梁州城
固縣西北太山以注華陽黑水蓋本古說案城固今

陝西縣也或以爲湏池夏時荒服之地禹跡不至也
岷嶠旣藝史記岷作汶藝作藪

地理志蜀郡湔氐道注禹貢嶓冢山在西徼外江水所出
今四川松潘屬卽漢滿氐道山在廳西北隴西郡西縣注禹貢嶓冢山西漢所出
班固嶓冢山在漢陽西鄭氏水去已可種藝傳

采班志謂嶓冢在西縣西漢水所出鄭君謂漢陽據後漢時地名卽西縣也水經禹貢山水澤地所在云嶓冢山在隴西氐道縣之南郡國志漢陽西有嶓冢山今甘肅秦州卽漢隴西地嶓冢山在秦州西南卽禹貢之嶓冢也自後魏地形志華陽郡嶓冢縣有嶓

冢山漢水出焉華陽今陝西漢中府甯羌州沔縣界
杜佑通典云嶓冢在今漢中郡金牛縣括地志嶓冢
山在梁州金牛縣東二十八里並承魏收之誤後人
遂以甯羌州北之嶓冢附會爲東漢水之源不知東
漢水卽漢志沮水未嘗經甯羌之地也蔡傳又謂嶓
冢一山跨兩州縣又誤以漢中之西縣爲隴西之西
縣郢書燕說不足置辨胡東樵亦誤從俗說反駁漢
志之乖謂有二嶓冢其謬甚矣

沱潛旣道

漢書作溝史記作澠

地理志蜀郡郫縣自注禹貢江沱在西東入大江汶江

縣自注江沱在西南東入江

班固

江源出四川雜谷屬

界東南流至保縣西北入大江

洪亮吉

或以爲保縣玉輪

江也

孫星衍

案沱出郫縣卽今之郫江保縣屬四川茂州

今茂州北有漢汶江故城潛水一名復水又曰龍門水

在今四川廣元縣與梁州之沱潛別互詳見前

鄭注謂江原有鄧江首出江南至犍爲武陽入江豈沱之類與案班志江原下有鄧水自別一水與沱無涉今不从

蔡蒙旅平

蔡山曰旅平言治功畢

傳

地理志蔡蒙在漢嘉縣

鄭氏

漢志蜀郡青衣有禹貢蒙山應劭云順帝改曰漢嘉
縣鄭注從順帝改名今四川雅州府名山縣卽漢青
衣縣地蒙山在州南鄭以蔡蒙爲一山爲傳妄以蔡
蒙爲二山疏云蔡山不知所在蓋本無此山也宋歐
陽忞輿地廣記云蔡山在雅州嚴道縣葉少蘊以縣
東五里周公山當之蔡傳从輿地廣記閻潛邱謂蔡
山不可信是也胡東樵又以爲峨眉其說亦想當然
耳非確論也

和夷底續

和土夷所居之地也和讀爲桓地理志桓水出蜀郡蜀

山西南行羌中者也

氏鄭

水經桓水出蜀郡岷山西南行

羌中入于南海注自桓水以南爲夷書所謂和夷底續

也

酈道元

案如氏注漢書云陳留之俗言桓聲如和鄭讀和爲桓正與下因桓是來合其說確矣寰宇記有和川水在榮經縣北冕以道謂卽禹貢之和水曾彥和从之林少穎謂今雅州有和川鎮卽和夷故地冕氏又謂夷水出巴郡魚復縣又東過夷道縣雖指駁之東樵謂和水卽涐水又謂漢志涐水乃涐字之誤當從說文作涐案顏注涐音哉玉篇廣韻十六咍涐水名段

若膺說文注又改澣字作澣卽澣字紛紛肌造未足信也

厥土青黎

史記伯夷列傳

色青黑而沃壤

傳

史公作驪詩傳謂純黑曰驪亦黑色也馬融云黎小疏也顏師古曰色青而細疏今不取

厥田惟上下厥賦下中三錯

田第七賦第八雜出第七第九三等

傳

厥貢璆鐵銀鏤砮磬

黃金之美者謂之鏗鏤剛鐵可以刻鏤也

鄭

蜀郡卓氏

至以鐵冶富擬邦君則梁州之利尤在鐵故鐵先於銀

也

曾氏

漢志犍爲郡朱提縣山出銀每銀八兩爲一流直

一千五百八十

鄒仁近

漢子犍爲水演得古磬十六枚

金氏

臺登縣山有磬石禹貢所賦

華陽國志

鐵石山在臺登縣東

三十里有磬石火煉成鐵極剛利

元和利志

寰宇記鐵石山

磬石火燒成鐵爲劍戟極剛利則與荆之唯中矢斃者
異矣

胡渭

釋文璆徐又居虯反馬同徐邈馬融俱讀若璆又引

韋昭郭璞云紫磨金並與鄭合經以璆鐵對舉當訓

金爲長且與下璆琳有別傳訓玉名東晉古文改作

璆从玉故僞傳云然

熊羆狐狸織皮西傾因桓是來

漢志作西傾因桓是來

言貢四獸之皮又貢雜屬顏師古以屬者曰織以裘者曰

皮

蘇氏

治西傾山因桓水是來言無他道也

馬融

地理志西

傾山在隴西臨洮

鄭氏

桓水已見上文

漢志水經俱以禹貢桓水在蜀郡孔穎達正義史記索隱俱从之夏氏謂桓水一名白水白水出今陝西邠州衛東南分水嶺胡東樵取其說今不从

西傾在臨洮山在今陝西洮州衛西南三百三十餘里西套厄魯特界延袤千里外跨諸羌正與桓水行

羌中相接魏書吐谷渾傳阿豺田干西彊山卽西傾
段國沙州記稱龍臺山皆一山異名也

鄭氏此注云桓是隴阪名其道盤桓旋曲而上故名
曰桓今不从

浮于潛逾于汚入于渭亂于河

史記通作踰

漢上曰汙越汙而北入渭浮東渡河正絕流曰亂

傳或

謂漢爲汙鄭氏水經桓水注自西傾至葭萌入于西漢卽

鄭元之所謂潛水者也自西漢遯流而届于晉壽界沮
濛枝津南厯岡穴迤邐而接漢沿此入濛晉所謂浮潛
而逾汙矣厯漢川至南鄭縣屬于褒水暨于衙嶺之南

漢水支灌于斜川屈于武功而北達于渭水

酈道元

水經汚水出武都沮縣東狼谷口注云汚水一名沮水庾仲雍云是水南至關城合西漢水漢水又東北合沮口同爲漢水之源也故知氏曰北方人謂漢水爲汚水蓋與汚合也

史記河渠書武帝時有人上書欲通褒斜道及漕事張湯問之曰褒水通汚斜水通渭皆可以行船漕孫淵如謂汚不通渭故經文言逾酈注以褒斜二水爲自汚入渭之道恐未必是禹迹也

漢沮縣今陝西漢中府略陽縣東南至汚縣西南入

漢水名曰沮口

黑水西河惟雍州

雍州界自黑水而東至于西河

鄭氏
黑水出張掖雞山南

流至殲煌過三危山南流入于南海

酈道元水經注書
正義引今水經注

脫此文張掖今甘州府張掖縣河經龍門而南至于華陰爲西河

胡渭雍

州今陝西臨洮平涼慶陽延安鳳翔五府西安府長安

咸寧咸陽興平臨潼高陵鄂藍田涇陽三原盩厔渭南

富平醴泉朝邑郃陽澄城白水韓城華陰蒲城同官武

功永壽三水涇化長武二十七縣同華耀乾邠五州

昌府隴西安定會寧通渭寧遠伏羌西和秦安清水漳

禮十一縣秦州及榆林寧夏寧夏中端遠岷州洮州甘
州莊浪諸衛所南至西傾積石西踰三危北抵沙漠皆
是也

地理今釋

括地志源出伊州伊吾縣北百二十里南流絕三危
山在沙州燉煌縣東南四十里地理今釋雍州黑水
出陝西甘肅塞外南流至河州入積石河今俗名大
通河是也諸說小異今从酈注

禮記子夏退而老於西河之上史記魏武侯浮西河
而下吳起爲西河守皆此西河之水也

弱水旣西

衆水皆東此獨西流故記其西下也

鄭氏

導之西流至于

合黎

傳地理志張掖郡刪丹桑欽以爲弱水自此西至

酒泉合黎說文作溺水云溺水自張掖刪丹西至酒泉

合黎餘波入于流沙桑欽所說又云岷山溺水所出

許慎

案岷山卽張掖雜山
刪丹今甘州府山丹縣

淮南子弱水出窮石山今山丹縣西南有窮石山卽

其地通鑑魏太武擊柔然循弱水西行魏書稱西接

張掖水賈耽謂張掖河卽弱水是也法顯佛國記謂

之流沙河在今山丹非絕域之弱水也又山海經崑

崙邱下弱水郭注其水不勝鴻毛史記大宛傳稱弱

水西王母漢志臨羌縣有西王母石室弱水昆仑山
祠楚辭哀時命云弱水汨其難爲兮路中斷而不通
漢書西域傳大秦國有弱水流沙西王母所居處近
於日所入也十洲記禹乘蹠車渡弱水博物志漢武
帝時西域胡來獻香乘毛車以渡弱水史記正義弱
水出女國北阿耨達山卽崑崙也舊唐書東女國王
居康延川中有弱水南流用牛皮爲船以渡漢書司
馬相如大人賦經營炎火而浮弱水兮應劭曰弱水
出張掖師古曰弱水謂西域絕遠之水乘毛車以渡
者耳非張掖弱水也顏監此說最核以上諸書所云

弱水在絕域與禹貢弱水無涉蔡傳駁程大昌條支之說甚是又引柳宗元愚溪對謂弱水不能負芥此卽郭景純所云不勝鴻毛非此經之弱水也

涇屬渭汭

屬入也

馬融

水北曰汭言治涇水入于渭傳汭水相入也

說文地理志安定郡涇陽升頭山在西禹貢涇水所出東

南至陽陵入渭過郡三行千六百里雍州川

孫星衍曰過郡三安

定右扶風左涇城在今陝西西安府高陵縣西南涇水在縣東入渭隴

西郡首陽渭水所出東至船司空入河過郡四行千八

百七十里雍州寢

孫曰過郡四隴西天水右扶風左馬朝也

孔傳屬遠也今不从蔡傳謂涇渭汭三水連屬引周禮其川涇汭黃東發胡東樵俱非之今不从

漆沮既從

地理志北地郡直路自注沮水出西東入洛左馮翊襄德自注洛水東南入渭

班固
縣西北
襄德今陝西富平縣

案直路今陝西中部說

文作瀟水云瀟水出北地直路

西東入洛

許慎水經渭水

又東過華陰縣北注云洛水入焉關驅以爲漆沮之水

也又沮水注云沮水東注鄭渠濁水與沮水合俗謂之

漆水又謂之爲漆沮水

酈道元
漆沮卽馮翊之洛水

顏師古水古

毛詩自土沮漆周頌猗與漆沮傳謂漆沮岐周二水

皆謂扶風之漆沮與禹貢漆沮爲洛水迥不相涉孔
穎達導渭正義旣知東過漆沮與毛詩漆沮別而此
疏猶引地理志漆水出扶風漆縣誤矣僞孔傳謂漆
沮爲洛水出馬翊而又曰漆沮二水名失之蔡傳亦
知漆非扶風之漆水又謂漆水來經華原縣合沮水
總由不知漆沮之爲一水耳

洪亮吉曰漢時沮水由鄭渠入洛故洛水亦有沮漆
之名非謂漆沮卽洛也案周禮職方氏其浸渭洛鄭
注洛出懷德毛詩瞻彼洛矣傳宗周溉浸水也孔疏
洛水則漆沮是也與下導洛之洛別

灋水攸同 地理志作適師 古曰適古攸字也 儀所也

地理志右扶風鄧自注鄧水出東南北過上林苑入渭

班固

同之于渭

傳

詩曰豐水東注維禹之績言同于渭也

班正義

曰屬曰從曰同皆主渭而言也

蔡

豐灋鄧音義同今

豐水在陝西咸陽縣東南入渭

荆岐旣旅終南憇物至于鳥鼠

史記憇作憩

地理志左馮翊襄德自注禹貢北條荆山在南下有彊

梁源

襄德今侯西富平縣

右扶風美陽自注禹貢岐山在西北

美陽

今同州府

扶風右扶風武功自注太壹山古文以爲終南垂

山古文以爲憇物

武功今鳳翔府郿縣

皆在縣東

班固

已旅祭言治

功畢此荆在岐東非荊州之荆

傳

太一山亦名太白山

在武功縣南

水經注

鳥鼠詳見後

案漢志據古文以太壹爲終南孟堅所稱卽孔壁古

文說也初學記終南山引五經要義云終南山長安

南山也一名太一要義劉向所撰向親校中秘古文

故所說與孟堅合足徵漢志之核續漢書郡國志右

扶風武功永平八年復有太一山本終南文選西京

賦於前則終南太一吳薛綜注二山名也李善从其

說失之然水經渭水注引杜預曰中南亦曰太白山

在武功縣南初學記引秦州記太一山古文以爲終

南福地記云終南太一山在長安西南五十里陸德明孔穎達並據漢志太一卽終南史記索隱同皆古文說也

又續漢書郡國志右扶風垂山本散物釋文帽物山名亦引漢書云垂山也胡東樵謂垂山卽太一之北峯無二山也孫淵如改垂山爲岳山俗呼敖山敖岳聲之轉肥說不可从

水經禹貢山水澤地所在華山爲西嶽在宏農華陰縣西南注古文之帽物山也如酈之說則垂山當作華山字形之誤

華山與終南縣延相望又鳥鼠爲渭水所出華山在渭水南地勢接連則以華山爲帽物可備一說

原隰底績至于豬野

詩云度其隰原卽此原隰是也原隰幽地從此致功西

至豬野之澤也

鄭氏

地理志武威縣注休屠澤在東北古

文以爲豬墾澤

班固

今甘肅涼州府鎮番縣卽武威縣地

休屠澤在縣東北

水經禹貢山水澤地所在云都野澤在武威縣東北

都豬音義同

三危旣宅三苗丕敘

史記宅作度丕敘作大序

西裔之山已可居三苗之族大有次敘傳水經禹貢山

水澤地所在云三危山在燉煌縣南注卽尚書所云竄
三苗子三危春秋傳曰允姓之戎居于瓜州杜林曰燉

煌古瓜州也

元 鄖道

三危在沙州燉煌縣東南四十里山

有三峯故名

括地志

三危旣宅此治黑水之成功也

傳三氏

苗今爲湖廣岳州府地吳起曰三苗之國左洞庭右彭
蠡是也

胡渭

鄭氏引河圖及地說云三危在鳥鼠西南與岐山相連當岷山則在積石之東南水經注四十引山海經云三危山三青鳥居之在鳥鼠山西太平御覽地部

引河圖括地象曰三危山在鳥鼠之西南與汶山相
接皆與鄭合如鄭此說則三危非今安西州燉煌縣
之三危也戴震水地記謂燉煌三危山不協禹貢之
文其名蓋後起也孔穎達疏又謂三危山必是西裔
未知山之所在諸說不同今从酈注

厥土惟黃壤

黃者土之正色

蔡傳黃壤最貴故雍田上上陳

厥田惟上上厥賦中下

田第一賦第六人功少傳治水之後卽爲此差在後隨
人少多必得更立其等此非永定也正義

厥貢惟球琳琅玕

史記作璆琳

球琳皆玉名

傳 琅玕珠也

鄭氏

爾雅西北之美者有崑崙虛之璆琳琅玕焉郭注璆
琳美玉名琅玕狀如珠也山海經曰崑崙山有琅玕
樹說文球玉磬也或作璆琳美玉也琅玕似珠者僞
孔傳亦云石而似珠云石非也雖指引傳云石而似
玉更誤爾雅崑崙虛之璆琳胡東樵邵二雲謂卽子
聞之玉近之

商頌受小球大球箋謂小玉尺二寸圭大玉珽長三
尺玉藻笏天子以球玉毛詩韃琫有珌傳有璆珌胡

東樵謂圭秘笏珽皆用球爲之不止鳴球磬材也

上林賦玫瑰碧琳西都賦琳珉青熒琳乃玉之青碧色者鄭書注謂琳美石也今不从

張衡詩何以報之青琅玕曾植詩腰佩翠琅玕名醫別錄琅玕陶宏景曰此蜀都賦所稱青珠也

浮于積石至于龍門西河會于渭汭

地理志金城郡河關自注積石山在西南羌中左馮翊

夏陽

今陝西韓城縣

自注龍門山在北

班固

龍門山在同州韓城

縣北五十里李奇云禹鑿通河處廣八十步

據地志此州

達帝都有二道浮于積石至于龍門西河者一道也自

渭汭以達于河者又一道也

林氏

織皮崑崙析支渠搜西戎卽敘

史記作昆侖無作序漢書作昆崙渠叟馬古日叟讀

日搜

岷倫在臨羌西析支在河關西

馬別

有昆倫之山非河

所出者也

鄭氏

崑崙析支渠搜三國名也

顏師

三國皆西

戎故以西戎總括於下

林氏

三國皆織皮

蘇氏

梁州言熊羆

狐狸織皮此獨言織皮者蒙上文也

傅氏

地理志金城郡臨羌縣注西北至塞外有昆倫山祠

崔鴻十六國春秋云張駿時酒泉太守馬岌上言酒

泉南山卽崑崙之體括地志云在酒泉縣西南八十

里今甘肅肅州西南岷崐山正在古雍州之域卽禹貢之崑崙也與河出岷崐無涉馬鄭說確不可易

水經河水注引司馬彪曰西羌者自析支以西濱於河首在右居也河水屈而東北流逕於析支之地是爲河曲矣後漢西羌傳西羌本三苗及舜徙之三危河關之西南羌地是也濱於賜支賜支者禹貢所南析支者也馬融王肅俱謂析支在河關其說較來

地理志朔方有渠搜縣禮三朝記曰北發渠搜南撫交趾水經注河水自朔方東轉逕渠搜縣故城渠搜在今陝西懷遠縣北晉書中陸德明釋文亦引漢志

在朔方卽禹貢之渠搜也

傳以崑崙析支渠搜爲四國正義謂析渠搜爲二恐非傳意並西戎爲四國鄭謂崑崙析支渠搜爲三山之野皆西戎也蘇氏謂此文當在浮于積石三句之前簡編脫誤今皆不从